

Headlines

- 1 उपराज्यपाल मनोज सिन्हा होरें मुख्य भरै च तीर्थ यात्रुएं गी जम्मू कश्मीर च अध्यात्मिक यात्रा लेई साददा दित्ता ऐ।
- 2 सुरक्षाबलें उत्तरी कश्मीर च कुपवाड़ा जिले दे तंगधार सेक्टर च घुसपैठ दी इक कोश्ट गी नाकाम कीता, थेआर ते गोला बरूद सनें होर दुआ समेयान बरामद कीता गेआ।
- 3 बीजेपी दे वरिष्ठ नेता अभित शाह होरें आखेआ ऐ जे पाकिस्तान दे नजैज कब्जे आला जम्मू कश्मीर भारत दा हिससा ऐ ते अस इसी हर कीमत पर वापस लैगे।
- 4 मजूदा लोकसभा चुनाएं दे पैहले चार गेड़ें च 45 करोड़ शा बद्ध लोकें वोट पाए न।

**LG-Pilgrims**

उपराज्यपाल मनोज सिन्हा होरें कटड़ा च इक सभा गी संबोधत करदे होई यात्रुएं गी जम्मू कश्मीर दी अध्यात्मिक यात्रा लेई साददा दित्ता। श्री सिन्हा होरें अगले म्हीने दी 29 तरीक थमां श्रुय होने आला श्री अमरनाथ जी दी पवित्र सलाना यात्रा लेई तीर्थ यात्रुए गी टकोहदे तौरा पर साददा दित्ता। उपराज्यपाल होरें श्रीमद भागवत गीता कथा च शामिल होने ताई कटड़ा पुज्जे हे। कथा भाई रमेश भाई ओझा हुंदे आस्सेआ कीती जा'रदी ऐ।

**SMVDSB-Helicopter**

घट्ट समें च टकोहदे दर्शनं दी तारंग रखने आलें गी माता वैष्णो देवी दे भक्तें सहूलत आस्तै श्री माता वैष्णो देवी श्राईन बोर्ड पैहले थमां घोषत जम्मू थमां सांझी छत्त हैलीकाप्टर सेवा अगले म्हीने जून थमां शुरू होने दी संभावना ऐ। सूत्रें दस्सेआ जे बोर्ड उनें यात्रुएं ताई जम्मू थमां सांझी छत्त हैलीकाप्टर सेवा शुरू करन जा'रदा ऐ जेहड़े इक्कै दिनै च भवन च मता दे दर्शन करना चांहदे न। जानकारी दित्ती गेइ ऐ जेकर सब किश तैह कार्यक्रम मताबक रेआ ते अगले म्हीने दे पैहले पखवाड़े च हैलीकाप्टर सेवा यात्रुएं लेई उपलब्ध करोआई दित्ती जाग। सहूलत दा लाह ठोआने आले यात्रुएं गी भवन थमां ढाई किलोमीटर दूर पंछी हैलीपैठ पर तोआरेआ जाग ते कन्नै गै इनें तीथ यात्रुएं गी टकोहदे दर्शन बी करोआए जांगन। सूत्रें दस्सेआ श्राईन बोर्ड दळुं किस्मै दे पैकेज उपलब्ध करोआ करदा ऐ सेम डे रिटर्न यानि उस्सै ध्याड़े वापसी यात्रा लेई 35 ज्हार ते **Next Day Return** यानि अगले ध्याड़े वापसी ताई 50 ज्हार फही यात्री साबै कराया लैता जाग।



Infiltration

उत्तरी कश्मीर च कुपवाड़ा जिले दे तंगधार सेक्टर च घुसपैठ दी इक कोश्ट गी नाकाम करदे होई दऊं बे-पंछानू घुसपैठिएं मारे गे। पुलस दे सूत्रें दस्सेआ जे दऊं घुसपैठिएं बन्ना टप्पियै इत्त बक्खी औने दी कोश्ट करा करदे हे। सुरक्षाबलें उनें परतोने दी चेतावनी दित्ती पर ओहू नेई मन्ने, नतीजन होई दी गोलीबारी दरान ओ दवै मारे गे। अधिकारिएं दस्सेआ जे दूई बक्खी दो लोथां पेई दियां दिक्खियां गेइयां न। तोआई थ्होई दी इक टकोह्दी सूह पर कारवाई करदे होई भारतीय सेना ते जम्मू कश्मीर पुलस आस्सेआ अज्ज कुपवाड़ा जिले दे अमरोही तंगधार इलाके च सांझा तपाशी अगियां चलाया गेआ। सेना नै सोशल मीडिया पर कीती गेदी इक पोस्ट च दस्सेआ जे अभियान च दऊं पस्तोलां, गोला बरूद ते जंग च इस्तेमाल होने आला समेयान बरामद कीता गेआ। नजैज थेआरें दी मजूदगी बारे थ्होई दी पक्की सूह दी बिनाह पर सुरक्षाबलें सौहगे होइयै इलाके दी तपाशी लैती। बरामद कीते गेदे थेआरें गी जबत करियै अगड़ी जांच शुरू करी दित्ती गेई ऐ।



Shah-POJK

बीजेपी दे वरिष्ठ नेता ते केन्द्री गृहमंत्री अमित शाह होरें फही दोहराया ऐ जे पाकिस्तान दे नजैज कब्जे आला जम्मू कश्मीर भारत दा ऐ ते भारत इसी हर कीमत पर वापस लैग। बिहार च सीतामढ़ी च इक रैली गी संबोधत करदे होई शाह होरें कांग्रेस दी अगुवाई आले विपक्ष पर नशाना लांदे होई आखेआ जे विपक्ष पाकिस्तान दे नां ते ओह्दे परमाणु शक्ति होने दे नां पर लोकें गी डरा'रदा ऐ। उनें गलाया जे जिसलै दफा 370 हटाई गेई ही तां राहुल गांधी होरें आखेआ हा जे एह्दे कन्नै खून खराबा होइ सकदा ऐ। 5 ब'रे होई गेदे न पर किश नेइं होआ। पर कांग्रेस दे भ्याल फारूक अब्दुल्ला होरें आख्खदे न जे भारत पाकिस्तान दे नजैज कब्जे आले जम्मू कश्मीर गी वापस नेई लेई सकदा ऐ की जे पाकिस्तान परमाणु शक्ति ऐ। शाह होरें आखेआ ते ओहू माता सीता दी जन्म स्थली परा एहू आखना चांह्दे न जे भारत ते ओह्दे 140 करोड़ लोक कुसै कोला नेई डरदे। पाकिस्तान दे कब्जे आला जम्मू कश्मीर साढा ऐ। शाह होरें दावा कीता ऐ जे मोदी हुंदी अगुवाई आली सरकार दे कार्यकाल च भारत नेपाल बन्ने पर पूरी चाल्ली सुरक्षा जकीनी बनाई जाग।



LG-JSD

उपराज्यपाल मनोज सिन्हा होरें जल शक्ति मैहकमे दिएं परियोजनाएं ते स्कीमें दी प्रगति दा जायजा लैता। उपराज्यपाल होरें आखेआ जे केन्द्र शासत प्रदेश च हुन 14 लक्ख 91 ज्हार ग्रामीण इलाकें दे घरें च नलके राएं पीने आला पानी उपलब्ध करोआया गेआ ऐ। उनें अफसरें गी हिदायत कीती जे ओहू हर घर गी नलके राएं पीने आला पानी उपलब्ध करोआने दे सब्बै जतन करन। उनें आखेआ जे हर इक नागरिक गी पीने आला साफ पानी उपलब्ध होए, एह्दे लेई सरकार सेई बत्ता पर जा'रदी ऐ। उनें गलाया जे अस भविक्ख लेई पानी प्रबंधन आला सरिस्ता तैआर करा'रनेआं उपराज्यपाल होरें जिले स्थाबै हासल उपलब्धिएं बारे दस्सेआ गेआ। उनेंगी जिले सहाबै जल जीवन मिशन तैहत कीते गेदे कम्में दी जानकारी बी दित्ती गेई। उनें कम्म तोड़ चाढदे बेल्लै कम्में दा म्यार, पारदर्शिता ते जवाबदेई बनाई रखने लेई अफसरें पर जोर पाया। उनें कम्में गी मित्थे गेदे समें अंदर पूरा करने पर बी जोर पाया। बैठक दरान पानी

समितिएं दे कम्मकाज त`जल जीवन मिशन दी अमलावरी कन्नै जुड़े दे माले दा बी जायजा लैता। उनें गर्मिएं दे मौसम लेई कार्ययोजना दा बी जायजा लैता की जे इनें दिनें पानी दी मंग बधी जंदी ऐ। बैठक दरान प्रधानमंत्री विकास पैकेज तैहत परियोजना। श्री अमरनाथ जी दी यात्रा तैहत कीते जा`रदे कम्म ते होरने दुइएं परियोजनाएं दा बी जायजा लैता।

<><><><><><>

Thakur-Sign Language

सूचना ते प्रसारण मंत्री अनुराग सिंह ठाकुर होरें इस ब`रे होने आले टी-20 क्रिकेट विश्व कप दरान भारतीय सांकेतिक भाषा ते आडियो कमेंट्री उपलब्ध करोआने लेई इंडिया साइनिंग हैंडस प्राइवेट लिमिटेड कन्नै नेके निजी खेल चैनलें दे सैहयोग दी सराहना कीती ऐ। सोशल मीडिया पर कीती गेदी अपनी इक पोस्ट च श्री ठाकुर होरें गलाया जे एह गैह सरकारै दे समावेशिता आले नजरियै दे मताबक ऐ।

<><><><><><>

Fire Grid Station

उधमपुर जिले दे बद्धल बल्लियां औद्योगिक इलाकें च अज्ज इक ग्रिड स्टेशन च अगग लगी गई। आकाशवाणी जम्मू दे संवाददाता नै खबर दित्ती ऐ जे घटना दी जानकारी थोंदे गै अगग साहलने आलियां गडिडियां मौके पर पुज्जी गेइयां ते अगग पर काबू पाना शुरू करी दित्ता। स्टेशन अंदर बड़ी मती मिकदार च तेल ते बड्डे ट्रांसफार्मर रखे गेदे न। डीएसपी प्रहलाद शर्मा होरें आखेआ जे जियां गै उनेंगी अगग लगने दी जानकारी थोई, थाना प्रभारी मौके पर पुज्जी गे। अगग साहलने दियां कोश्टा लगातार जारी न ते इस सरबंधे च होर मते ब्यारे गी बलगेआ जा करदा ऐ।

<><><><><><>

ECI Polling Date

चला करदे लोकसभा चुनाएं दे पैहले चार गेडें च 45 करोड़ शा बद्ध लोकें वोट पाने आले अपने हक्कै दा इस्तेमाल कीता ऐ। चुनां आयोग नै अज्ज इक ब्यानै च दस्सेआ जे आम चुनां 2024 दे पैहले 4 गेडें च कुल रलाइयै मतदान 66.95 फीसद रेआ ऐ। आयोग नै गलाया जे मतदान दी उच्ची प्रतिशत भारत दे वोटर पाससेआ दुनिया ताई इक बेहतर सनेआ ऐ। आयोग नै मतदाताएं अगगै अपील कीती ऐ जे ओह बाकी पेदे गेडें च बी बड़ी बद्ध गिनतरी च वोट पाने ताई अगगै औन। आयोग नै इस कोश्ट च मन्नी परमन्नी दिएं हस्तिएं दे कन्नै गै सार्वजनिक ते निजी संगठनें गी बी शामिल कीता ऐ।

<><><><><><>

PM

उत्तर प्रदेश च अगले गेड़ दे चुनां ताई बक्ख-बक्ख सियासी दलें दे स्टार प्रचारक वोटरें गी अपनी बक्खी खिच्चने दा पूरा दम खमल । करदे न। प्रधानमंत्री ते बीजेपी दे वरिष्ठ नेता नरेन्द्र मोदी होरें अज्ज उत्तर प्रदेश दे जौनपुर च इक चुनावी रैली गी संबोधत करदे होई आखेआ जे सीएए मोदी दी गारंटी दी मिसाल ऐ। उनें गलाया जे बीजेपी जेहड़े बी वादे करदी ऐ, उनेंगी पूरा बी करदी ऐ। श्री मोदी होरें आखेआ जे पैहले विकास दिल्ली ते मुंबई जनेह् शैहरें तगर गै सीमित हा पर हुन अयोध्या ते काशी जनेइए धार्मिक थाहरें पर बी मता विकास होआ ऐ।

<><><><><><>

CBC Poonch

सूचना ते प्रसारण मंत्रालय हेठ केन्द्रीय संचार ब्यूरो नै जिला प्रशासन पुंछ कन्नै रलियै पुंछ दे श्री कृष्णा चन्द्र मैमोरियल सरकारी डिग्री कालेज च स्वीप तैहत जागरूकता अभियान चलाया। कार्यक्रम दा मकसद मतदाताएं च जागरूकता पैदा करना, नागरिकें दी चुनां प्रक्रिया च शमूलियत गी बधाना खास करी युवा दी हिस्सेदारी मतदान प्रक्रिया च बधाना हा। कार्यक्रम दरान नेकां गतिविधिएं दा सरिस्ता कीता गेआ जेहदे राएं विद्यार्थिएं गी वोट पाने दे महत्त्वै लोकतांत्रिक प्रक्रिया च मतदान ते उंदी भूमका बारे दस्सेआ गेआ।

<><><><><><>

Dengue

मच्छरें थमां होने आलियां डेंगू ते मलेरिया जनेइयां बमारिएं थमां बचने आस्तै कटुआ दे मुख्क मैडिकल अफसर डॉ. विलय रैणा होरें मैडिकल अमले कन्नै जागरूकता वैन गी सैल्ली झंडी दस्सियै रवाना कीता। एहदा मकसद लोकें गी मच्छरें दे कटने कन्नै होने आलिएं बमारिएं ते उंदे बचाह बारे जागरूक करना ऐ।

<><><><><><>

JMC-Fine

जम्मू नगर निगम तौले गै ऐसे लोकें पर जुर्माना आयत करोग जेहदे सार्वजनिक थाहरें गी गंदा करदे पाए जांगन। जेएमसी दे अधिकारी नै गलाया जे कोई बी व्यक्ति जेहड़ा सार्वजनिक थाहर पर पेशाब करोग, पान, गुटखा, सुपारी जां तम्बाकू खाइयै सार्वजनिक थाहरें पर थुक्कदे पाए जांगन, उंदे पर 5 जहार रपे तगर दा जुर्माना लाया जाग। जम्मू नगर निगम दे आयुक्त राहुल यादव होर सेहत सरबंधी सीगे ते फील्ड अमले गी इस ब'रे आदेश जारी करी दित्ते गेदे न। कुसै बी व्यक्ति गी सार्वजनिक थाहर गी गंदा करने पर बख्खोआ नेई जाग। केई सार थाहरें पर शौचालय बनाए गेदे न, लोकें गी उंदा इस्तेमाल करना लोड़चदा ना कि सार्वजनिक थाहरें गी गंदा करना चाहिदा। अधिकारी मूजब जेकर कोई मौके पर जुर्माना नेई भरदा तां फही चलान जारी कीता जाग ते उसी फही अदालत च जाइयै जमा करना होग।

<><><><><><>

Supreme Court

सुप्रीम कोर्ट नै आखेआ ऐ जे जेकर विशेष अदालत नै इक बारी पवर्तन निदेशालय दी शकैत दा संज्ञान लैता ऐ तां निदेशालय कुसै आरोपी गी गिरफ्तार नेई करी सकदा। अदालतै आखेआ ऐ जे अपराध दा संज्ञान लैते जाने मगरा प्रवर्तन निदेशालय ते ओह्दे अधिकारिं गी रपे पैसे दे हेर फेर सरबंधी अधिनियम पीएमएलए दी दफा 19 तैह्त्त कुसै आरोपी गी गिरफ्तार करने दी इजाजत नेई दिंदा। न्यायमूर्ति अभय एस.ओका ते उज्जल भूयान हुंदी पीठ नै आखेआ ऐ जे जेकर प्रवर्तन निदेशालय आरोपी दी हिरासत चांह्दा ऐ तां उसी खास अनुरोध करियै आवेदन करना होग। अदालतै एह् बी आखेआ ऐ जे जेकर प्रवर्तन निदेशालय इक गै अपराध दे बारे च बाद्दू जांच करना चांह्दा ऐ तां ओह् ऐसे व्यक्ति गी गिरफ्तार करी सकदा ऐ जिसी पैह्ले थमां दर्ज शकैत च आरोपी नेई दस्सेआ गेआ ऐ। पर इसदे आस्तै दफा 19 दी शर्ते गी पूरा करना होग।

<><><><><><>